

3 Wäö

cadota ante nänö tömanta yewæmongainta

Gayo ingante Wäö nänö waa apænedö

¹Gayo botö nê waadebi êñëmi. Bitö botö nê nö waadete pönëmi iñömite botö nê aabo Picæmo mini änömo inte, Acæbiimpa, ante yewæmömopa.

²Botö nê waadebi êñëmi. Tömëmi önöwoca incæ waa ewocate quëwëmi bai bitö baonga adobaï waa êñabi quëwencæbiimpa, äninque ayæ, Bitö quëwenguinö ante bitö cöwë waa pönï quëwencæbiimpa, ämopa.

³Mönö tönïñadäni pancadäniya iñömö pöninque, Gayo iñömö Itota Codito nö pönï nänö angainö ante cöwë nö pönëninque cæcampa, ante apænedänitapa. Ayæ, Gayo ñöwo godömenque nöinö cægonte bai quëwengä ingampa, ante apænedäni êñëninque nanguï pönï totabopa. ⁴Botö wëmini bai imini iminitedö ante, Itota Codito nö pönï nänö angainö bai tömënäni nöinö cægonte bai quëwënäni inänipa, ante apænedäni êñëninque botö godömenque watapæ toquinque impa.

⁵Botö nê waadebi êñëmi. Mönö tönïñadäni incæ bitö nê tæcæ adinäni inäni incæte bitö quinö tömënäni beyæ ante cædinque cöwë pönëninque ædæmö cæbi imipa. ⁶Codito ingante godongämæ möni pönencabo iñömönite mäninäni wæætë, Gayo nê waadete pönengä ingampa, ante mönitö imönite apænedäni êñentamönipa. Tömënäni Wængongui ingante nê cædäni inänipa cæbii. Bitö tömënäni inänite godö cæbi æninque gomonga godäni ininque waa imaimpa. ⁷Edæ tömënäni iñömö Itota emöwo beyænque tao godänitapa.

Mänömaï goyönänite nê êñënamäi cædäni dicæ pönönäni ænänitawogaa.

⁸Mänömaï beyæ mönö Wængongui nöingä nänö angainö ante tömënäni tönö godongämæ cæcæimpa, ante cædinque mäninäni bai inäni mönö oncö pönäni adinque mönö, Pö guiite cænte möedäni, angüenëmö imompa.

Diotedepeto tönö Deëmetedio

⁹Codito ingante mini pönencabo iñöminite botö minitö iminite do yewæmontabopa. Incæte Diotedepeto iñömö, Botö nê awënë imopa, ante nê cæinëngä inte mönitö imönite Baa äninque nänënë cæcä ingampa. ¹⁰Minitö weca botö pöninque tömengä quinö nänö cædö ante edonque pönï apænebo êñencæminimpa. Edæ tömengä mönitö imönitedö ante önonquedö ante wënæ wënæ apænecampa. Ayæ mäninö ante wii eyepæ impa, ante pönente ingä ininque tömengä edæ mönö tönïñadäni pönäni adinque, Pö guiite cænte möedäni, änämaï ingampa töö. Wadäni guiquënë, Pö guiite cænte möedäni, ancæte ante nê cæinënäni inänite tömengä adobaï, Cædämaï iedäni, ante wææ angä ingampa. Ayæ mänömaï cædäni adinque tömengä, Mönitö Codito ingante möni godongämæ pönencabo iñömönite minitö gobæwedäni, angampa cæbii.

¹¹Botö nê waadebi êñëmi. Quinö wënæ wënæ i adinque bitö adodö cædämaï ië. Wæætë quinö waa i adinque adodö cæe. Quinö waa impa, ante nê cædäni iñömö Wængongui wënäni inänipa. Quinö wënæ wënæ impa, ante

nē cædāni guiquēnē Wængonguī ingante adāmaī inānīpa.

¹²Deēmetedio ingantedö ante tōmänāni waa apændānīpa. Wængonguī nöingā nānō quēwēnō baī Deēmetedio adobaī nōinō cæte quēwēnongā ingampa, ante acæimpa. Mōnitō adobaī tōmengā ingante ante waa apænemōni imōnīpa. Ayæ tōmengā ingantedö mōnō āninō nō impa, ante do ēñēmīpa.

Wäö iinque nānō yewæmongainō

¹³Mīnitō imīnite godōmenque nanguī äinente wæbo incæ yewæmōingö inte

wentamōmä yewæmōimæ inte wīī yewæmōinēmopa. ¹⁴Wæætē bitō weca wantæ iñō pōninque botō äinēmo imopa. Pōmo ate botō bitō tōnō awincadō awinca adinque apænecæmōnaimpa.

¹⁵Bitō piyænē cæte quēwencæbiimpa, ämopa. Mōnō æmigoidi iñömō quēwēnāni bitō imite, Waa quēwencæbiimpa, ante apændānīpa. Mōnō æmigoidi bitō weca quēwēnāni tōmänāni inānite wæætē bitō adocanque ingante adocanque ingante apændinque, Waa quēwencæbiimpa, ante botō beyæ apænebi ēñencædānīpa, ämopa. Mānīnque ante yewæmōmopa.